





BIBLIOTHECA
UNIV. JAGELL.
CRACOVENSIS

CIM 4570

kalkomp.

Mag. St. Dr.





Id. 76.

3. fl. 1874 XII. 82.

A D A M I
S C H R Ö T E R I, S I L E S I L,
E L E G I A R V M L I,
B E R V N V S.
*


I T E M
Epigrammatum Liber unus.



A D C L A R I S S I M U M D O M I N U M
N I C O L A V M H V B N E R V M,
M E C O E N A T E M.

Te duce Pieridum nos lusimus ista sub antro,
Subq; patrocínio, scripsimus omne, tuo.

Biblioteka Jagiellońska.



C R A C O V I A E,
Lazarus Andree excudebat.

H. d. 76.

Sancto David Effigie

Antonius T.

NICOLAVS HVBNERVS
FRANCOPHORDIENSIS,
AD ADAMVM
Schrōterum.

CVm tua facundē perlegi carmina Musæ,
Quæ tibi tam facilī dexteritate fluunt.
Hæc animo credas nostro tam grata fuerunt,
A mihi Peligno ceu data Vate forent.
Commendata meo, tamen hæc tua scripta, fauori,
Quod mea concelebrent nomina, nolo putas.
Sed cùm præclaros inter Schrōtere Poëtas,
Te meritò uideam posse tenere, locum.
Scilicet hoc propter, firmo te semper amore,
(Id tua nam uirtus cogit) Adame colam.
Téqz lubens omni qua possum parte iuuabo,
Ne uidear Musis, non bene uelle, tuis.



Cim. Gu. 4570

Poerze N° 2105

AD CLARISSIMVM
AC NOBILEM DOMINVM
NICOLAVM HVBNERVM
MECOENATEM
DEDICATORIA.

ADAMVS Schrōterus Silesius.

P Ræstans Pieridum decus Sororum, *Peckhew*
O Hübner, meq; parensq; Musæ,
Qui summo studium foues labore,
Phœbo Thespiaenum deo, dicatum.
Qui uirtute potens, potens & auro,
Inter nubila summa collocatus,
Fama quidquid in orbe uiuit, imples.
Sunt qui multa tuo ferunt fauori,
Ostro, munera, que nitent superbo,
Et donant uirides tibi Smaragdos,
Qui miris recreant modis ocellos,
Dum claros alii ferunt lapillos,
Nobis India quos perusta mittit,
Qui Gazas superant Midæ potentes.
Illorum sequar ut patronæ morem,
Transmitto tenuem tibi libellum,
Nostræ pignus is est nouum Thalie.

Añ Quam

Quamvis non liber hic nitebit auro,
Nec multum tenet eruditionis,
Alarum tamen hunc foue sub umbra,
Et uultu placidus legas sereno.
Nam mentis probitas, fidesq; nostræ,
In paruis elegis palam uidetur.
Quem nunc accipe, consulas boniq;
Olim Castalii, nouem Sorores
Plena cum mihi sunt manu daturg,
Fontis pocula, sub uirente Lauro,
Plena tunc tibi sum manu daturus,
Scripti grande genus, tuaq; dignum
Fama, nobilitate, gloriaq;
Quod Crœsi nec opes, nec ulla rerum
Vincet copia, sed minas iniquæ
Mortis, duraq; fata non timebit.
Quod dent omine, Di⁹ boni, secundo,
Quod restat precibus, meisq; uotis,
Commendo superis tuum fauorem,
Præstans Pieridum decus Sororum,
O Hübner, meq; parensq; Musæ.



ELEGIA I.

AD DOMINVM NICOLAVM
HVBNERVM ME.
COENATEM.

*

C Vltor & antistes nostri generose laboris,
Accipe per certas, uerba ligata, uices.
Siq; uacat paruq; dare tempora parua Thalie,
Sydus Marchiacæ nobile gentis, ades.
Immensa quamvis es rerum mole grauatus,
Quo tamen huic possis te dare, tempus erit.
Musæq; nec uestras temeraria fertur ad aures,
Que uenit, illa tuo mota fauore uenit,
Summa tuis primo debetur gratia factis,
Respondet meritis, gratia nulla, tuis.
Si mihi Schrōtero foret aurea uena loquendi,
Qua referunt Pylium præualuisse senem.
Nulla tibi posset meritas facundia grates
Mecœnas, dignis persoluisse modis,
Perq; uices doleo uarias, si qnando recordor,
Quid per te studiis utilitatis eat.
Tu mihi Gorgonei largiris pocula fontis,
Hinc mea Castalio corda liquore uigent.
Te duce Lauriferi concendi culmina montis,
In quibus Aonidum ludit amica cohors.
Te duce, fac harum sim uictor in arce Sororum,
Te duce Pieridum castra sequamur, age.

A iii Si

Si modo te probitas, studiumqz fidesqz mouebunt,
Si pietas, certe, cur mouearis, habes.
Si qua mei superest chari tibi cura parentis,
Curaqz si Lasci te manet ulla tui,
Qui tibi me uerbis tunc commendabat amicis,
Cum sibi conuiuas maximus inter eras.
Siqz meqz spectes hæc candida pectora mentis,
Sint indigna licet, digna fauore tamen.
Hinc & ut inde tuqz uarias sparguntur in oras,
Quas Deus è cornu diuite fundit, opes.
Auguror, en dubium nisi me mens præscia fallit,
Fata quidem studiis candidiora meis.
Te Mecœnatem Musarum saepè uocabo,
Cum dederο Clario, scripta probanda, Deo.
Inqz tuqz toto laudes Helicone loquentur,
Perpetuusqz tui cultor honoris ero.
Ecce uides, nostri dant pignora quanta Silesi,
Verbera quiqz patris pertimuere mei.
Quale dedit nuper specimen non uile Rudolphus,
Et plures, quorum nos pia turba latet.
Tu potes illorum numero me iungere Vatum,
Omine quod facias prosperiore, precor.
Sic mea Musa tui canet inclyta facta fauoris,
Quodqz meum fuerit seruiet omne tibi.
His age uiue dies, per mitia fata, serenos,
Vtqz tui memores, sic memor esto mei.

Eleg

ELEGIA II.
AD ANDRAEAM TRICE-
SIVM VT LIBROS
TVEATVR.
*

P Egasei præstans en fontis alumne Tricesi,
Carmina, que calamo sunt peragrata rudi,
Quamuis illa tui uirtus generosa parentis,
Te queat excelsò constituisse loco.
Quamuis & clarum genus, & spectabile nomen,
Clarus ab antiquis ordine ducis, aus.
Vt merito possis lumen, sydusqz uocari,
Inter Sarmatiæ tempus in omne, Duces,
Strennuus ipse tamen summis uirtutibus, addis
Antiquo generi, lumina clara, tuo.
Quamuis & patriæ notus splendore potentis,
Stemmatis, & summa nobilitate, tui.
Plus tamen extollunt te regia dona Mineruæ,
Maior & ingenij dotibus esse potes.
Tu quia Pierias haufisti largiter undas,
Hic ubi cæruleis labitur Albis aquis.
Inde tuum fama caput inter nubila condis,
Hinc tua Parnassi nomina seruat, apex.
Quid memorē! quanta linguæ dulcedine præstans,
Cecropi superas, aurea uerba, senis.
Suntqz tibi docto faciles in carmine Musæ,
Dictat appollineum, Musa uocata, melos.
Non

Non igitur dubito, teneræ mea prima Thaliæ
Carmina, iuditio supposuisse tuo:
Inqꝫ meos uestra si uideris urbe libellos,
Sunt tenues, tamen hos ut tueare precor:
Si quid habent, ut habet uitij mea scripta, rogamus
Ætati ueniam, docte Poeta, meæ.
Accipies maiora breui, quæ, digna Patrono
Doctorum dabimus docta per ora, meo:
Namqꝫ meis Musis se præbet in omnibus æquum.
Pandit & his portus, Italica ora, suos.
Viuit, Sarmatici decus o memorabile regni,
Meqꝫ tibi certo foedere iungat, amor.

*

E L E G I A I I I .

A D MECOENATEM CONSOLATIO
DE MORTE CLARISSIMI VIRI VALENTI-
NI HVBNERI PARENTIS EIVS.

C Vr sua plus solito rutilantia lumina Titan
Condit: & auricomum, nube tegente, iubar:
Sydera cur fugiunt: cur cynthia luna recedit:
Nec magis æthereo (quo solet) ore micat:
Cur nec & in toto nunc lucifer orbe uidetur:
Creditur et solitis abstinuisse uiis.
Quid feret hæc inopina noui mutatio rerum:
Quis precor, id rectè q mihi dicet, erit:
Ætas omnis ouans animis, plausuqꝫ fremebat,
Nullus & hîc, meritò qui doluisset, erat.

At nunc

At nunc non iuuenes tantum, pueriçꝫ, senesçꝫ
Pectora, solliciti plena timoris, habent.
Quidquid at immensus terrarum continet orbis,
Condolet, & summi machina tota poli.
Non philomela magis demulcerat cantibus aures,
Non magis ærig, dulce queruntur, aues.
Coa procul cessit uento purpura fastu,
Iura silent, cuius uindice facta carent.
Odera lene fluens, tumidis caput extulit undis,
Pluribus hunc casum flensçꝫ dolensçꝫ modis.
Nobilis urbs, Viadri que mollibus adiacet undis,
Tota gemit, gemitu penè coacta mori.
Ora Senatores manibus lachrymantia siccant,
Marchiacæ matres, Marchiacæqꝫ nurus.
Et qualem nostris fallacibus hostibus opto,
Talis & est tota uultus in urbe super.
Tu quoqꝫ Mecoenas, Heros ter maxime, mœsto
Tristitiæ tantum lumine cernis, onus.
Tuqꝫ mihi longe forma mutatus ab omni
Crederis, hei subito quo decus omne ruit?
Ipsa Sigismundi nullum domus inlyta regis,
Qui tecum meritis ordine certet, habet.
Æneas phrygios inter pulcherrimus, omnes,
Qualis erat, pulchro conspiciendus equo:
Sidoniam quando sequitur generofus Elisam,
Ut uarias agitent, per iuga summa, feras.
Talis eras, hæc sola tibi sit gloria soli,
Inter honoratos, quos fouet aula, Duce.

B Nulla

Nulla dies abiit, quin musica plectra sonarent,
Implerentq; tuas, tympana rauca, domus.
At nunc ingentes cæpisti pectore curas,
Nescio quid mientem sollicitetq; tuam.
Luctus & ultrices agitant tua pectora curæ,
Opprimiturq; tuum nunc sine fine capit.
Quid precor est? en, ecce subit, miserabile dictu.
Fata tuum terris eripuere patrem.
Dicite lugentes funebria carmina Musæ,
Vt sua post cineres fama superstes eat.
Non sic Alcyone Ceyca dolebat ademptum,
Nec gemit Ismarium, Cecropis ales, Itym.
Tullius, ingenio Romam qui maximus urbem
Ornauit, linguæ dexteritate suæ.
Non tantum patriam, post fata suprema, mouebat,
Æternum quamuis lumen in urbe fuit.
Hunc omnes quantum toto de pectore lugent,
Nec possunt lachrymis imposuisse modum,
Et merito, quis enim (modo sit sectator honesti)
Non uelit heu tanti funera flere Viri?
Clarus erat meritis, morum splendore nitebat,
Et tenuit primum, primus in urbe, locum.
Publica præposuit priuatæ commoda uitæ,
Iustitiæ certus cultor & author, erat.
Omnibus æquus erat, uigiliq; labore studebat,
Officio quemuis demeruisse bonum.
Phocidis & quamuis nunq; sudauit ad amnes,
Nec sua Gorgoneis ora rigauit aquis.

Attas

Attamen eloquio quemuis superare disertum,
Et potuit rigidos, ore mouere, Getas.
Famaq; Palladias quibus inclita parta per artes,
Palmaq; pieriæ dexteritatis, erat.
Illos, non aliter tanquam pia numina cœli,
Assidua coluit sedulitate, Viros.
Vidit enim, docti quid prosint omnibus horis,
Hinc ratus est illis numen inesse Dei.
Huncq; Senatus erat summo dignatus honore,
Donec uita fuit lege soluta necis.
Nobilis urbsq; uiro non est habitura secundum,
Quæ Viadri gelidas est sita propter aquas.
Plangite pupilli, charisq; parentibus orbi,
Plangite, sint lachrymis, omnia plena, piis.
Vester enim cecidit Mæcenas, atq; patronus,
Qui uobis largam sæpe ferebat opem.
Dicite lugentes funebria carmina Musæ,
Vt sua post cineres fama superstes eat:
Sed tu magnanimi, generosa propago, parentis,
Queso modum lachrymis (si potes) adde tuiss.
Alterius facile est fortissima uerba dolori,
(Contigit & cuius res ea) posse loqui.
Quid iuuat in fletum longas deducere uoces?
Nil agis, indignas cur petis ungue genas?
Fletibus haud manes, haud numina surda mouebis,
Sunt rata, quæ tristes proposuere Deæ.
Viuimus arbitrio superum, stat certa uoluntas,
Quilibet hoc nostrum tramite, carpet iter.

B ij Ibius

Ibimus huc omnes, & lege trahemur eadem,
Proximus & Cræso, squallidus Irus, erit.
Cæsar is en proauos, atauos, durissima, summi,
Nuper & heu sanctum Parca trahebat, auum.
Ipsaçp Ferdhandi, coniux clarissima, regis,
Non potuit certum transiliisse diem.
Nonne putas uotis feruentibus esse petitam?
Non tamen ad superas, est reuocata, domus.
Ergo age, siste precor tanti suspiria luctus,
Non redit ad stygias quem ratis egit aquas.
Vt sumus, en mortalis erat, nunc supprime fletus,
Non ita, perpetua nocte sepultus, aget.
Nobilis at uiuunt, celeberrima nomina, famæ,
Quæ sic perpetuum, sunt habitura, decus,
Mors licet hic nobis, mortalia corpora, demat,
Nil tamen in titulos iuris habere potest.
Dicite lugentes funebria carmina Musæ,
Vt sua post cineres fama superstes eat.
Ecce, patrem dum nos miserè lugemus ademptum,
Molliter elysium possidet ille solum.
Gaudet & è tantis se nubibus esse remotum,
Et quæis turbantur, sœcula nostra, malis.
Viue precor saluus, Domino comes addite Christo
Vt tibi perpetue gaudia pacis eant.
Si placet, hosçp breues, tumulo super addite, uersus.
Tristis & impositum littera signet opus.
Profuit officio quibus hic, uigiliçp labore,
Hæc profecturis, dicite uerba, modis.

eumidi

Nos

Nos tibi pro meritis uiolas & thura precamur,
Nec lædat cineres, ultima terra, tuos.

E L E G I A I I I I

A D A N D R A E A M S C H R O T E R V M
P A R E N T E M , A G I T
G R A T I A S .

Q Vas tibi p̄soluā merito, Pater optime, grates!
Quæ referam meritis, præmia digna, tuis?
Si mihi tercentum linguas natura dedisset,
Oratçp, Nestorea uoce, diserta forent.
Aut si Melpomene mihi dicit amabile carmen,
Adsit & ad partes, dexter Apollo, suas.
Plurima, quod paruis elegis committere possem,
Perpetuo gratae, carmina, mentis opus.
Non tamen ipse queam, dignis extendere uerbis,
(O pater, o animæ, pars ueneranda, meæ)
Quo tua me studio, pietasçp fidesçp paterna,
Fouerit, & curam gesserit usq; mei.
Quantaçp, sub sacro uigilans Helicone pararis,
Præuius huic nato, fila sequenda, tuo.
Tu mihi principum uitæ, Musæçp dedisti,
(Illa tamen Domino cuncta uolente Deo.)
Tu mea Palladias formasti corda per artes,
Phocidis hinc hausi pocta perennis aquæ.
Hinc tibi perpetuas deberem dicere grates,
Dignus ob id, tota posteritate, legi.

A ij Sed

Sed mea nunc alio mens est intenta labori,
Durior & uires Calliopeia negat.
At mihi tempus erit, labentibus ordine fatis,
Quo condam Clario, carmina digna, Deo.
Carmina, perpetuo gratam testantia mentem,
Possis & ut nati laudis honore, frui.
Filius ipse patri fama iungiatur, & ambo
Effugient auidos, post sua fata, rogos.
Temporis at tribuat Deus id, quo nostra canendo
Dextera, tam felix aggrediatur opus.
Interea clari, tua nomina clara, Silesi,
Immensis inter laudibus astra uehunt.
Summa tuoq; uenit capiti reuerentia cano,
Et tuus, ex merito te comitatur, honos.
Virq; puerq; tibi dignum meditantur honorem,
Silesii patres, Silesiaeq; nurus.
Nam uigil illorum, dulcissima pignora, natos,
Ingenuas artes, ter duo lustra, doces.
Artibus ingenuis, dum rustica pectora formas,
Dumq; fugas, quidquid rusticitatis habent.
Hei quot natorum te tunc facis ipse parentem,
Hunc animi uerum (si reor) esse patrem.
Et quamuis durus labor ille scholasticus, ingens
Sisyphium, curis uincere possit, onus.
Tu tamen hoc gaudes, sine quo nec uiuere posses,
(Si qua fides uerbis, est adhibenda, tuis)
Est adhibenda fides, nam uidimus omnia, quanto
Hic te detinuit durus, amore, labor.

Quod

Quod certè proprium nulli conceditur unquam,
Sed diuina tuum numina pectus, habet.
Numen & illud erit, donec Deus ipse iubebit,
Officio summas imposuisse manus.
Læto quod facias aliquando sydere lætus,
Saluus ut in superum sede quietus, agas.
Viuat & omnibus mater charissima, faustis.
Multaq; cum multo fratre, colenda Soror.
Vos Deus incolumes, qui temperat omnia nutu,
Seruet ad æternos, sœcula longa, dies.
Hocq; breui dubiæ, transacto tempore, uitæ,
Quilibet elisi, culta uireta, petat.

*

E L E G I A V

A D A N D R A E A M M A S C V M V I.
R V M S E N A T O R I V M,
S C R I B I T S E N A C T V M P A T R O N V M.

M Asce, nouenarum decus immortale Sororum,
Masce Senatorii, gloria magna, chori.
Ipse mihi quandam (cœlo nisi fallor aperto)
Fundebas fido, talia uerba, sono.
Ultima Parnassi loca dum Schrötere laboras
Linquere, dumq; studes ulteriora sequi.
Multa feres, facies, sudabis multa ferendo,
Suppones duro, colla premenda, iugo.
Perfer & obdura, quæ non ingrata tulerunt.
Patria quos summo dulcis honore souet.

Hinc

Hinc sibi diuitias, nomen, famamq; pararunt,
Surget & hinc ingens fama, decusq; tibi.
Illa meæ quamuis fuit exhortatio menti
Durior, experto nunc placet usq; magis.
Multus tuli, fœci, sudaui multa ferendo,
Et graue senserunt, colla tenella, iugum,
Post tamen hos casus, post tot discrimina rerum,
lactato uariis, Masce colende, modis.
Ecce mihi tandem Diui tribuere Patronum.
(Forsan adest Musis cœlitus ille fauor.)
Qui mihi Mecœnas, toto uenerabilis æuo,
Vera loquor, dempto fine colendus erit.
Namq; meas, animo prompto souet ille, Camænas.
Quaç; potest, ultrò, parte leuare, leuat.
Non satis est, addet multo maiora, mihiq;
Pandet Pieriæ, culta theatra, domus.
Meç; breui Christo cum fratribus auspice charis,
Mittet ad Euganeæ, limina sancta, scholæ.
Aut qua liligeri, cultissima mœnia, regis.
Musarum sacris undiq; septa, iacent.
Illiç ingenis doctrinæ semina nostris
Uberiora, ratas adiiciemus opes.
Tu tamen interea nostræ, pia cura, Thaliæ,
Maxima pars animi, Masce colende, mei.
Viuit, perpetuos fœlix fœliciter annos,
Charaq; tu coniux, saluus uterq; Vale.

Elegia vi.

ELEGIA VI

AD DOMINVM NICOLAVM HVBNERVM
MECOENATEM.
SE STUDIO POETICO DETINERI.

I Sta tui, per te surgentis, uerba Poetæ
Suscipe, disparibus, condita uerba, modis.
Vt genus humanum, semper diuersa uoluntas
Distrahit, & placet huic, qd minus alter amat,
Hic securus agit, dum frigus captat opacum,
Aut iacet ad ripas, lenè fluentis aquæ.
Ille modo uersat, celeres in puluere currus,
Fortiter & frenis ora retorquet, equi.
Huncq; tenent unctæ, iuuenilia dona, palestræ.
Dum pauidas, calamis decipit alter, aues.
Detinet agricolam, ruris sua cura paterni,
Impiger & duro uomere findit, humum.
Vere nouo flores, Autumni tempore fructus,
Quos certè multo fœnore carpat, habet.
Vt uagus argentum cumulet, mercator, & aurum,
Immensum dubiis nauibus æquor, arat.
Sunt, quibus arma libet ualidis vibrare lacertis,
Mauortisq; student, horrida castra, sequi.
Adde quod oblitus tenere uenator amicæ,
Frigidus, & nudo sub Ioue sæpe cubit.
Dum terret uaria timidas formidine Damas,
Dumq; erymanthæis retia tendit apris.

C Me

Me mea Calliope delectat, maxime Vatum,
Et itubet in certos nectere uerba pedes.
Vtq; nouenarum me, præmia magna, Sororum,
Secernant populo, docte Patronæ, rudi.
Me, Musasq; meas, animo amplectaris amico,
Vatibus atq; uelis inseruisse tuis.
Sic, te dante, meum caput inter nubila condam,
Vertice sic feriam, sydera summa, Vale.

ELEGIA VII

IN ARMA INCLITI DVCIS.
NICOLAI A' RADZI.
W I L. .:

Quem tua te summis Virtus Heroibus addit,
O princeps, animo, diuitiisq; potens.
Quamuis à claris titulos proauis, at auisq;
Et genus eximiæ nobilitatis, habes.
Vt tua uel totum sint nomina nota per orbem,
Stemmatis & clari, dextera fama, tui.
Nam tibi nobilitas concessit, & inclyta Virtus,
Vt tria cum gemino cornua pisce, geras.
Cornua, uenatrix quibus utitur ipsa Diana,
Cum generosa truces cuspide figit a pros.
Addita cornigeræ sunt lucida sydera Lunæ,
Ferreus & fortis calceus unus, equi.
Heroum, quæ sunt insignia uera, potentum.
Magnorum, quæ sunt præmia uera, Ducum.
Non

Non tamen hac fueras palma contentus auorum,
Nec ratus es, fortes ista decere Viros.
Sed tibi cura fuit, propria uirtute, manuq;
Nobilium uerum, posse parare, decus.
Ergo totius dominator, Carolus, orbis,
Cum uidit uestræ, fortia facta, manus.
Te quantum potuit titulis ornauit opimis,
Addidit & ueteri, nobile stemma, tuo.
Et dedit ad titulos, aquilam pernicibus alis,
Qualem, Ferdinandus Rex uenerandus, habet.
Insuper adiunxit galeas ex ordine trinas,
Quamlibet ex merito, pulchra corona, decet.
De quibus ascendit medium Louis ales, & huius
Circundat, præstans en diadema, caput.
Estq; leo primæ, rapidum tenet altera Gryphem,
Ista decent fortæ, fortia signa Duces.

ELEGIA VIII

IN IMAGINEM D. NIC. HVBNERI MECOENATIS.

C Alliope, reliquas inter, pars prima, Sorores,
Parnassi subito montis ab arce, ueni.
Ibis ad eximios, gratissima turba, Sodales,
Quorum sunt animo, pectora iuncta, meo.
Inuenies quosdam, qui pro grauitate senili,
Præscribunt populo, iura tenenda, suo.
Iam solio quamuis resident, sellaç; curuli,
Non tamen immemores (hos reor) esse mei.
Cñ Insuper

Insuper Ausonia multi in regione morantur,
Euganeq; subeunt dum pia tecta, scholæ.
Quidquid agent, à me cum te uenisse uidebunt,
Quilibet ex illis quid modo quereret, agam.
Dicito, Sarmatiæ uiuit Schrōterus in urbe,
Quam præter tacitis Istula serpit aquis.
Mitia qui uobis, & candida fata precatur,
Vosq; iubet uita prospere frui.
~~X~~ Cumq; sibi tantum dulces faueatis amici,
Ut nemo uobis iunctior esse queat.
Hæc uoluit uestro me significare fauori,
Posit ut illius notior esse status.
~~X~~ Ausonia inuitus cum nuper ab urbe, reuersus
Hac qua grandi sonans æstuat oenus, erat.
Sarmatiæ tandem fessus peruenit ad urbem,
In qua Thespiaenum, culta theatra, iacent.
Hic aderat iuuenis, Virtutibus auctus opimis,
Inclyta Marchiaci, fama, decusq; soli.
Nobilis ingenuas cui gloria parta per artes,
Palmaq; perpetuæ nobilitatis, erat.
Et qui facundos, studium ob commune, Poetas
Diligit, hos larga sæpe leuatq; manu,
Protinus huius erat iuuenis succensus amore,
Huic dabat & tales, ore loquente, sonos.
Huc ego diuersis, ueni iactatus, ab oris,
Virtutis certo motus amore tuq;.
Tu rogo grata feras, nostris Hübner Camœnisi,
Munera, da Musis, munera grata, meis.

Tu mi,

Tu mihi Mœcœnas facili cantabere uersu,
Te sciet occasus, quidquid & ortus, habet.
Et tua sic Virtus, populos cantata per omnes,
Viuet, & implebit solis utrancq; domum.
Econtra tales fundebat pectora uoces,
Desine, non hoc sunt, ista petenda, modo.
~~X~~ Sed cum præclaros inter Schrōtere Poetas,
Te merito uideam posse tenere, locum.
Scilicet hoc propter, firmo te semper amore.
(Id tua nam uirtus cogit) Adame colam.
Tu mihi præcipuos, non ultimus, inter amicos,
Nec mihi de multis iunctior, alter erit.
Vnanimes igitur, gratissima turba, sodales,
Cum procul à uestra sede remotus, agat.
Qui certè merito iuuenes supereminet omnes,
Quos tulit, aut unquam Teutonis ora feret.
Mittimus efficta uobis sub imagine uultus,
Ut manus artificum condere docta solet.
Illius effigies, uestris sit semper ocellis
Præsto, presentem quilibet esse putet.
Expressit pictor faciem, uultumq; uirilem,
At sua diuinum pectora numen, habent.
Te tuus hic Vates, priscis annalibus addet,
O iuuenis, summos inter habende Duces.
Te genuit Pallas, doctus te pauit Apollo,
Tecq; souet gracili, casta Minerua, sinu.
Regia te summis Virtus Heroibus addit,
Quis ferat immerito nomen ad astra tuum?

C iiij Nobile

Nobile Francfortum, tanto se iactet alumno,
Humeat pingues odera cuius agros.
Te tantum peperisse decus, regale, potensq;
Tolle triumphantes, Marchia læta, manus.
Talibus ante Viros rebus, mea Musa, peractis,
Desine, sunt animi, uota peracta, mei.
Detine nec longis faciles ambagibus aures,
Gratia colloquio, ni modus adsit, abest.
Insuper ipsa piis, blandisq; precabere uerbis,
Ut bene sint memores, tempus in omne, mei.
Quoq; solent semper nostrum coluisse patronum,
Firmus ut illorum pectore duret, amor.
Prospera sic illis concedat tempora uitæ,
Qui mare, qui terras, fœcit, & astra, Deus.

ELEGIA IX

AD DOMINVM NICOLAVM DORNSE
BACHIVM, CONSULEM.
QVERITVR SE DECESSISSE AB OFFI
CIO CONSULATV S.

*

¶ Ptime Dornsbachi, nræ uigil urbis Achates,
Dornsbachi patriæ, firma columna, meæ.
Nuper ut in uiridi solus spatiabar arena,
Multaq; de meritis, mente reuoluo, tuis.
Hic, ubi securæ meditamur carmina mentis,
Cum sequimur numeros, Naso Poeta, tuos.
Nescio

Nescio, quem subito mea mens defertur ad amnem;
Esse uenerandum numen in amne, reor.
Non situs ad Gracchi locus est iucundior urbem,
Qua tumidus raucas, Istula uoluit, aquas.
Namq; nouem uiridi ludunt in littore Musæ,
Cumq; sua doctus Pallade, Phœbus adest.
Quas ego conspiciens, propius uestigia uerto,
Percipiens uarios, aure patente, sonos.
Omnia me calamo, Musæ uidere, notantem.
Ex quibus una mihi talibus orsa loqui.
Cultor Apollinei generis Schrötere, quid ergo
Non tua funereis imbribus ora rigas?
Imbribus ora riges, & corda doloribus aptes,
Res ea solliciti plena timoris erit.
Qui primas tenuit, patriæq; regebat habenas,
Et dura durum mole ferebat onus.
Fessus is, officii, curisq; grauatus acerbis,
Dicitur hei curam deposuisse sui,
Sit licet huic lectus prudens successor honori,
Non tamen horribili, res caret illa, metu.
Publica res illo quia consule tota ualebat,
Floruit & patriæ resq; statusq; tuæ.
Dixit, & impleuit tristi mea pectora luctu,
Multus erat querulo iustus in ore dolor.
Forsitan, huic animo gratissima Zitta, requiris?
Cur mihi cura tuas sit doluisse uices.
An nescis? quoties mihi basia b landa dedisti,
Foueris & tepido, membra tenella, sinu.

Si

Si quoq; Dornsbachi celeberrime, forte requiras,
Cur tua tam memori nomina mente loquar.
Te præsens summo, semper uenerabar, honore,
Illud & à uestra sede remotus, ago.
Quatenus & uiuam te te reuerenter amabo,
Qui iubet hoc, sancte me tibi iunxit, amor.
Venturum tribuat Deus o fœliciter annum,
Ille precor uentis ocyor annus, eat.
Rursus ut accipias, dignos te Consule, fasces,
Claraq; perpetuo tempore scæptra feras.
Palladis (utq; soles) defendito fortiter artes,
Quæ te conspicuo constituere loco.
Sic Deus omnipotens, magni faber unicus orbis,
Pectoris incæptum sospitet omne tui.
Ergo uale, patriæ decus indelebile nostræ,
Ergo uale, longos, sed sine nube, dies.

E L E G I A X

A D D O M I N V M C H R I S T O P H O R V M
C E T V I T Z A S C H I L T B A C H .

A G I T G R A T I A S P R O A C C E P T I S B E N E F I C I I S .

I Te precor faciles, ad nostra poemata, Musæ,
Ne cogar longas increpuisse moras.
Ite Deæ faciles, celeriç requirite cursu,
Limina Teutonicæ, grataç tecta domus.
Nobilis hic Heros, uestris quærendus ocellis
Inlyta Cetuitiæ gloria gentis, erit.

Ille uir,

Ille uir, æternæ uerus uirtutis alumnus,
Sæpius à uobis cur meditetur, habet.
Hic quia sæpe solet lapsas releuare Camœnas,
Vestrac; deuota numina mente, colit.
Hæc illi, postquam fuerit data copia fandi,
Dicite, iucundis, debita uerba, modis.
Qui coluit uestros Schröterus honore penates
Sedulus, hospitii sanctac; iura tui.
Scilicet ut curis, turbac; remotus ab omni,
Conderet aonio, scripta probanda, choro.
Temporis his igitur modo pro breuitate peractis,
Ad Mecœnatem cogitur ire suum.
Cogitur ire, tuum grauiter licet ipse fauorem
Deserat, & dulcis, dulcia quæç, domus.
Ibit ad eximii gratas Antistitis ædes,
Nam tulit augurii, dextera signa, boni.
Vidit enim geminas pascentes ille columbas,
Dum mouet in uiridi, musica plectra, solo.
Ibit, & hei charos linquet, dulcesq; penates,
Et loca Pieriæ, semper amanda, Deæ.
Attamen ante ruet connexi machina cœli,
Quam nequeat studii non memor esse tui.
Forsan & Ausoniæ (charo legante patrono)
Arua pétat, per te quod modo certus habet.
Quæ loca cunic; petet, tu sarcina grata futurus,
Illijs & Musas dulce sequeris onus,
Hasq; tibi memori meditatur pectore grates,
Optat & huic uitæ, candida fata, tuæ.

D Huncq;

Huncq; uenerandus si Spiritus ille Deorum
Coniunctum sacris Vatibus esse uolet.
Sol adeò nunquam tepidas mergetur in undas,
Quin sua te facili Pieris ore canat.
Vt tua per totum clarescant nomina mundum,
Nomina, moxonio carmine digna, Vale.

ELEGIA XI

AD ORNATISSIMUM IVVENEM
CASPARVM RVDOLPHVM,
SILESIVM.

UT STRENNVE IN INCAEPTO STUDIO
POETICO PERGAT,
HORTATVR.

*

INgens Thespiaenum lumen, Caspare, Dearum.
Iuditio, iuuenis semper amate, meo.
Scripta tuæ nuper legi lepidissima Musæ,
Quæ certè miris perplacuere modis.
Illaç me, multosq; tuo iunxere fauori,
Quorum semper erit mentio grata tibi.
Quis Deus ante diem, tanto tua pectora flatu
Impleuit? certè cœlitus illud habes.
Perge sacer Vates Phœbeo ludere uersu,
Pergito, sic Vatum de grege magnus eris.
Ecce sedent uiridi graciles in littore Musæ,
Et nectunt capiti, laurea ferta, tuo.

Affur

X Assurgent summa quondam tibi laude Silesi,
Nobilis & nostræ gloria gentis eris.
Perge sacer Vates, iuuenis celeberrime, perge,
Nec pia diuinæ castra relinque Deæ.
Inuenit certum facilis tua Musa Patronum,
Quis non Mecœnas gaudeat esse tibi?
Te precor incolu[m]em seruent pia numina nobis,
Seruet ad æternos, Parca benigna, dies.
Semper & ô nobis aliiquid meditare legendum,
Quod studiosa cohors, posteritasq; probet.

ELEGIA XII

AD QVENDAM QVI PLVS OPERAE
IVRIS PRUDENTIAE. QVAM POESI
ESSE DANDVM,
SCRIPSERAT,

X E Loquar? an sileam? sine nomine facta legatur?
Omnibus an notum nomen in orbe uelim?
Quisquis es, ut taceo nomen, sic usq; caueto,
Ne tua trux Iambus, criminis tanta, notet.
Aut insanus eras, furiis agitatus acerbis,
Aut fuit in uariis, mens tua stulta, locis.
Quando meas, per te mihi littera fertur, ad aures,
Littera, consilii, dura ministra, ui.
Scilicet Aonidum ne strennuus i se Sororum,
Otia peruigili tuta labore, sequar.

D ij Sed

Sed potius spreto leges Helicone seueras,
Impiger ingenio supposuisse uelim.
E quibus argenti mihi copia diues, & auri,
Surgeret, & rigidi, gratia magna, fori.
Obiicis idq; mihi, quod Vatum maximus ille
Mœonides, nullas accumularit opes,
Funditus en pereat, tenebrisq; prematur iniquis,
Qui probat æternas, utilitate, deas.
Quod tibi causidicis petitur clamoribus aurum,
Labitur hinc fugiens, more fluentis aquæ.
At bona, Phœbœi sibi quæ peperere Poetæ,
Dic precor, hæc quanto sunt meliora tuis?
Quæ neq; Parca potest, nec edax abolere uetus tas,
Hæc bona, funereoſ effugiuntq; rogos.
Quidquid & aonio scripserunt carmine Vates,
Illud ad æternos, statq; manetq; dies.
Dicito, magnanimus quot sœcula uixit Homerus?
Viuit, & æternum carmine nomen habet.
Nomen & Andini superest post fata Maronis,
Nec sumus immemores, Naso Poeta, tui.
Artibus hisq; Viri, quondam studuere, potentes,
Dedita nec regum, turba pusilla, fuit.
Ergo, nonne tuam uexat dementia mentem?
Quod petiere Duces, cur mihi turpe putem?
Ipse tibi quæras peritum legibus aurum,
Tristis & attonitos, iure tuere, reos.
Nostra mihi interea, (charo comitante Patrono,) Carmine perpetuas Musa parabit opes.

Dum

Dum Mecœnatem gracili meditatur auena,
Tangit & auratae, dulcia plectra, lyræ,

ELEGIA XIII

AD DOMINVM NICOLAVM HVBNERVM
MECOENATEM.

INDICAT DOLOREM, CVM AB ILLO
PRIMO ABIVERIT IN
VNGARIAM.

CVm subit illius mihi tristis imago diei,
Quo dixi summum, docte Patrone, Vale.
Quoq; tuos liqui dulces, charosq; penates,
Per uultus lachrymæ, fluminis instar eunt.
Cum reputo, quanto me sis complexus amore,
Et dederis studiis, præmia quanta, meis.
Corda dolore labant, querulus dolor occupat intus
Corporis exanimi, tristia membra, mei.
Non adeo dolui, non tantum fleuimus inquam.
Dulcia cum patrii liquimus arua soli.
Non merito doleam? quis non putat esse dolendū?
Amittet charum, nostra Thalia, patrem.
Nil, nisi me duræ, durissima numina, Parcae.
Diuidet, à laribus, docte Patrone, tuis.
Quas tu cunq; uolens fueris delatus ad oras,
Aut loca, quæ terra, suntq; remota, mari.
Si forsan nequeo præsenti uiuere præsens,
Mente tamen fuero, sarcina parua, tibi.

D ij Me sib

Me sibi si socium Pollux cum Castore poscat,
Cœlestes nolim, te sine, adire plagas.
Te semper colui, multis de millibus, unum,
Dilectiç⁹ mihi more parentis eras.
Non adeoç⁹ tibi despectum nomen Adami,
Vile licet, curæ sed tamen illud, erat.
Quando abii, tunc mœstus eras, (si uera fatemur)
Nullaç⁹ pars, lachrymis quæ caruisset, erat,
Grandibus in paruis quod si conceditur uti
Exemplis, subito grandibus utar ego.
Non tantus mœror, non tantus deniq⁹ luctus,
Illion à Danais cum caperetur, erat.
Singula quid referam? mea pectora mœsta, doloris
Exoptant aliquem, posse uidere, modum.
Pieris ergo tuo mea commendata fauori
Semper erit, finem sic habitura, Vale.

ELEGIA XIVI

AD MODESTVM IVVENE M
MARCVM AMBROSIVM
SILESIVM.

M Arce mihi charos inter, pars prima, sodales,
Pars desyderii maxima, Marce, mei.
Ante suos repetet cursus Croëensis Oaxes,
Aut qui pannonios Ister inundat agros.
Ante lepus tarda poterit testudine uinci,
Nec uagus æquoreas piscis amabit aquas,

Quam

Quam mihi displiceant tam gratæ pectora mentis,
Illaç⁹, quæ iunxit te mihi, certa fides.
Nam tua cum nobis subit officiosa uoluutas,
Cogor amicitiæ debitor esse tuæ.
Quod fuit Eurialus Niso, tibi certior illo
(Equa modo) si res ulla requiret, ero.
Alter & Actorides, me semper habebis Accillem,
Pro te sustineam, tristia quæç⁹, pati.
Pirithooç⁹ uelut Theseus comes ibat amico,
Sic peteres stygios, me comitante, lacus.
Sed tibi cur mirum, dulcissime Marce, uidetur?
Quod toties Bacchi, dulcia festa, colo.
Ille dedit lepidis, gratissima dona, Camœnis,
Qualia nec Pallas, nec dedit ipsa Ceres.
Quem, ueteres tantum quod si coluere Poetæ,
Cur sua non nouus hūc miles ad arma, uocet?
Vina dabunt semper faciles in carmine uires,
Et nisi mixta mero, carmina nulla, ualent.
Nam sacra Pieridum quoties accessit Homerus,
Ranarum nunç⁹ balnea sumpsit, aquas.
Ergo si ueterum sequimur uestigia Vatum,
Fortiter hic nobis mosç⁹ sequendus erit.
Ne mirere igitur posthac, sed multa paratus,
Pocula nectarei plena liquoris, habe.



Elegia xv.

ELEGIA XV

AD DOMINVM NICOLAVM HVBNE.
RVM MECOENATEM,
DE CORONATIONE REGINAE
BARBARAE.

*

Pierides Latiæ, comitantibus ite Pelasgjs,
Omnia sic uobis conuenienter eant.
Exiguumq; meo carmen fertote Patrono,
Qui præbet nostræ, uela secunda, rati.
Quem solum mea Musa colit, ueneratur, amatq;
Cuīus & ingenio numen inesse putat.
Cui tribuunt multum docti, totusq; uidetur
Nobile Nasoni præripuisse decus.
Dicte, Schröterus uotis feruentibus optat,
Vt spatium uitæ, molle sit omne, tuæ.
Nosq; tibi celeri cursu transmittit ab urbe,
Quam præter tacitas Istula uoluit aquas.
Illius ut paucis ageremus nomine tecum,
Quodq; breui præsens (si modo uiuet) agets.
Præterea quædam mississet carmina uobis,
Fœturam Musæ (misit ut ante) suæ.
At non tempus erat, neq; tunc angustia passa est,
Plura per incertos cogere uerba pedes.
Attamen interea clari, de coniuge, Regis,
Quando coronata est, distichon istud habe.

Hic

Hic regale decus, regalis Barbara coniux
Quando tulit, fuerat, terra sepulta, niue:
Hoc rude quod numerū carmen complectitur anni,
Ne tibi, nec reliquis dispuisse uelit.
Quod superest, columen præstans Hübner Dearū
Viuit, cumq; tuis alite uiue bona.

numerus
anni,

ELEGIA XVI

AD DOMINVM NICOLAVM HVBNERVM
MECOENATEM,
LOCO MVNERIS NATALITII.

Mos erat antiquis toto memorabilis ævo,
Romaniscq; fuit ciuib; usq; frequens.
Veloces quoties cæpit reuocare Calendas
Ianus, qui gemina lumina fronte gerit.
Munere quod fidus donaret amicus, amicum,
Quod, certum certi pignus amoris, erat.
Ergo Mecœnas, sanctarum fama Sororum,
Mecœnas studii, portus & aura, mei.
Ipse ego sim charos licet ultimus inter amicos,
Quos tibi Theseo iunxit amore, fides.
Vtq; tuo uideas quantum studeamq; uelimq;
Nomine, per Musas certior esse potes.
Exemplo ueterum, præstantia dona, Virorum,
Si tantum possem talia ferre, darem.
Sed Dea, quæ nimium uultu me terret iniquo,
Impedit, at memorem non uetat esse tui.

E Mitti

Mittimus interea chartacea munera, dono;
Munera, quæ mihi sunt diuite prompta penus
Quæ rogo sint animo memori gratoq; recepta,
Neuè tibi quidq; displicuisse uelint.
Namq; tuo donat mea mens, animusq; fauori,
(Quo nihil hoc nobis dulcius esse potest)
Corpus, & ingenii vires, animiç; uigorem,
Quidquid & est Vatis, dedicat omne tibi.
Adde quod & supplex & prona mente precatur,
Qui caret extremo, principioq; Deum.
Annus ut hic fœlix, fœlicior usq; recurrat,
Et tribuat uitæ, mollia fata, tuae.
Saluus & ut peragas longæuæ tempora uitæ.
Ex hoc in longos, tempora longa, dies.
Quid memorabilius, uel quid præstantius unquam?
Vtile quidue magis maximus orbis habet:
Quam longæ, quibus usus adest, habuisse senectæ,
Publica qui curent pro grauitate, Viros.
Illi transacti spatiosi temporis, ætas,
Et sapere & multis consuluisse, dedit.
Sit satis, atq; nouo uiuas bene saluus in anno,
Cunctaç; pro uoto stentq; cadantq; tuo.



Elegia xvii

ELEGIA XVII

AD DOMINVM NICOLAVM HVBNÆ-
RVM MECOENATEM,
MITTIT ILLI CARMEN
HEROICVM.

*
Quis merito querat? quoties tua nomina meti
Affectu subeant nocte, dieq; meæ.
Lumina dum solis tepidis merguntur in undis,
Ostenditq; faces, nox tenebrosa, suas.
Dumq; refert mundo, rutilantia lumina, Titan,
Dumq; trahit medio Phœbus in axe diem.
Mentio grata tui nullo delebitur æuo,
Nec sinet immemores nominis esse tui.
Te solum mea Musa colit, ueneratur, honorat,
Credit & amplexum numen habere tuum.
X | Verbaç; nostra fide careant, nisi dicat abundè,
Se tibi coniunctam, tempus in omne, fore.
Et calamo quodcumq; meo meditabitur unq;
Dedicat illa tibi, dicit & esse tuum.
Ergo ne dubites, ne spes uideatur inanis,
Sed uideas, quantum sit studiosa tui.
Mittimus interea specimen tibi uile Poesis,
Mittimus hæc Domino, scripta dicata, meo.
Non mea quod iactem, uesano carmina fastu,
Aut illis multum ponderis esse putem.

Eñ Non,

Non, ast illa docent, nil hoc sub sole perenne,
Nil adeò firmum, quod queat esse diu.
Non mihi diuitiae, nec fuluum quæritur aurum,
Grandia nec Cræsi diuitis æra peto.
Illa meæ uiuat Musæ post funera Virtus,
Et mea post certum fata supersit, opus.
Sat mihi diues ero, si me, charumq; Patronum
Quidquid in hoc toto permanet orbe, leget.
~~X~~ Quo feror? aut quorsum? q; me mó detinet error?
Sit satis & cæptam perfice Musa uiam.
Nunc age mente legas placida, quæ scripta sequunt.
Sunt, tibi quæ placeant, admoneantq; mei.

A D D O N I N V M N I
C O L A V M H V B N E R V M
M E C O E N A T E M.

VX
Pontè sua, quamuis caput inter nubila condat
Imperiosa tuum, quæ tendit ad ardua Virtus,
Misceat & superis tua te pietasq; fidesq;
Vtile consilium, grauitas, moresq; probati,
Sanctaç; naturæ bonitas, & nescia fraudis
Simplicitas, & uis in rebus summa gerendis,
Et genus, & census, & nobile nomen auorum,
Labe torusq; carens & ab omni crimine purus.
Et tua grandiloquens doctæ facundia linguæ,
Nam tibi Mecœnas datur aurea uena loquendi,
Nestoreum quæ tu potis es superare liquorem.

Quam

Quamuis & satis ipse quidem, per teq; tuum'q;
Scilicet ingenium, Superum uenerabile munus,
Te, nomenq; tuum, totum uolitare per orbem,
Efficias, ut uon humilis, tua fama, Poetæ
Versibus indigeat, cui sunt in carmine Musæ
Perfaciles, & cui pro uoto iussa capessant.
Inclyta cui Pallas animo famulatur amico,
Et qui multa queat doctis mandare libellis,
Vel quæ posteritas, uenturaç; soæla probarent.
Illa tamen non causa uetat, non usq; repugnat,
Ne Mecœnatis meditemur nomina nostri.
Sed mea Musa mihi stimulos, & calcar eunti
Subdit, & absq; mora totis me uiribus urget,
Ne mihi grata tui cadat unq; mentio, neue
Longius in calamo lateat tua regia Virtus.
Non secus, ac primos palmæ petiturus honores,
Per se currit equus, celeri pede, cursibus auras
Exuperare studens, laudum succensus amore.
Cum tamen hortatur, ne quæ mora tardet euntem,
Altius ingreditur gaudens, cæptoç; labori
Omnibus incumbens animi conatibus, omnes
Accipit ante alios uolucris data præmia cursus.
Sic ego sponte mea, Musisq; iubentibus ipsis,
In laudes feror usq; tuas, & nomen auitum.
Iam quia non tantum uideor mihi iuris habere,
Ut cohibere manus, scribendis uersibus aptas,
Aut ullo possim uinclo frænare tenaci,
Quo minus ipse mihi tali, Patrone, Patrono
E ij Glorier,

Glorier, inq; poli me partibus esse locatum
Glorier, Aonidum præstans & fida mearum,
Anchora, præsidium, tutela, parensq; sororum;
Te colat & seruet Cytharæ pulsator Apollo,
Te ter trina louis soboles ueneretur, amicq;. 20
Principium tu namq; mihi, geniumq; dedisti,
Et dabitur per te mihi meta suprema laborum.
Tu mihi semper ades fautor, nostrisq; Camœnis
Plurima non tantum uerbis, & uoce daturum
Promittis, sed res & factum uerba sequuntur.
Quas referam grates Hübnero & dicite Musæ,
Dicte Pierides, studii, nostrisq; laboris
Participes, quia uos nostis, quam multa locarit,
Quantaq; præstiterit nostræ benefacta Poesi.
Res ignota, silent omnes sermone represso,
Alloquor his iterum dictis, audite sorores
Uraniæ, dignis an digna rependere possim,
Hæc mihi (ni fallor) potior sententia uisa est,
Cœlicolum supplex, pronusq; precabor ad aras,
Ut tribuant illi, uel quæ uehit aurifer Hermus
Munera, diuitias & opes, geminasq; micantes,
Quæ possint Arabum gazam superare superbam.
Talibus auditis, Musæ risere solutis
Oribus, & mirabantur mea uerba loquentis.
Protinus ipsa chori medium mea Diua relinquens,
Calliope, quæ me summo complexa fauore,
Me petit, & postquam proprius uestigia pressit,
Incipit, & dubium uerbis affatur amicis.

Cultor

Cultor Appollinei generis Schrötere requiris;
Qua ratione queas, dignas persoluere grates
Hübnero, quo non meritis præstantior alter.
Quem genuit Phœbus, doctus quem pauit Apollo,
Inclyta quemq; sinu Pallas lactauit amoeno,
Quiq; tuis semper studiis ita profuit, ut te
Non secus ac proprios fratres (si uera fatemur)
Diligat, est foelix tali tua Musa Patrono.
Tu tamen aduertas, illi quæ dona preceris,
Non ego diuitias, non aurum pondera facti
Infectue uolo, quibus is prius usq; redundat.
Rerum tempus edax ferrum consumit & aurum,
Quidquid & in toto terrarum nascitur orbe.
Nil adeo stabile est, quod non spatiova uetustas
Perdat, & annorum series, confundat & ordo.
Iam periére diu septem miracula mundi,
Regia nunc ubi sunt Cyri monumenta superbi?
Diruta Troia iaces, curuo te findit aratro
Rusticus, & segetes intra tua moenia crescunt.
Præterea fortes uixere ante Hectora multi,
Consilio, meritisq; graues, multumq; ualentibus
Dotibus ingenii, pietate, fideiq; probati.
Non minus hos etiam nitido, Dea luminis expers,
Fœcerat argento magnos, opibusq; potentes.
Quid iuuat? ignoti nunc omnes morte tenentur,
Et miseri tenebris & nocte premuntur iniqua,
Namq; carent docto Phœbœi carmine Vatis.
Tu si grata uoles Hübnero dona parare,

Munera

Munera sic accepta satis retulisse putato!
Cum sis Laurigerum totus Schrötere Sororum,
Natus ad arma chori, quarum tua rector Apollo,
Ante diem celebri iuuenilia pectora flatu
Impleuit, graciliqz tibi permisit auena
Ludere quæ uelles, nostris accingere iussis.
Dignum laude Virum, semper tua musa loquetur,
Æternæqz canes illi præconia famæ,
Quod uero citius peragas, promitto futuram
Auxiliatricem tibi me, comitemqz laborum.
Dixit, & ad doctas est ista reuersa Sorores,
E contrâ tales fundebam pectori uoces,
Quod me cunqz iubes faciam, (mea maxima cura)
Admonitus meliora sequar, meliora parabo
Munera, nam certè male grati nomen haberem,
(Nomine quo peius totus nil continet orbis)
Ni mea Musa Viri laudes celebraret, & usqz
Ferret ad ætherei rutilantia sydera coeli.
Et nisi conarer, bonitatis munera largæ
Illijs, quæcunqz mihi, quæcunqz Camœnis
Sæpe meis dederit, facili describere uersu.
Vos igitur faciles ad nostra poemata Musæ,
Nunc mecum cantate precor, cantate rogatæ,
Voce simul summa nunc terqz quaterqz canatis.
O Hübner, facis tuus hic quod uiuit Adamus,
O Hübner, facis tuus hic quod scribit Adamus.

* * *

Adami

A D A M I S
SCHROTERI SILESII,
EPIGRAMMATVM
LIBER ▶

*

A D C L A R I S S I M V M
DOMINVM MARTINVM
ZALOGA.
DEDICATORIA
EPIGRAMMATVM.

Nostra dabit gratos, tibi docte Zaloga, libellos
Pieris, Andino, digne Zaloga, stylo,
Quamprimum manibus calamos aptauerit istis
Hübnerus, Musæ duxqz paterqz meæ.
Ut tamen interea queat officiosa fauorem,
Et studiis animum demeruisse tuum.
Accipe, quæ tenui sunt carmina condita uersu,
Quæ uolumus primi muneris esse loco.
Accipe, succinctum te munus & illud habentem,
Sæpius arguta cum breuitate iuuet.
Vestra quod æternæ committet nomina famæ,
Nostra breui certum Musa parabit opus.
Te quia Meccenas, animo ueneratur amico,
Ergo meæ fueris cura secunda Deæ.

F In ar-

IN ARMA DOMINI

NICOLAI HVBNERI,
M E C O E N A T I S.

*

Maximus immenso meritis Hübnerus in orbe,
Clarissim⁹ & ingenii nobilitate sui.
Cur precor in titulis timidam Schrōtere columbā,
Vndiq⁹ quam prudens circuit anguis, habet.
Hæc sibi Maiestas, toto memorabilis æuo,
Quæ regit imperio Sarmata regna, dedit.
Huic solers Ithaci sapientia cedit Vlissis,
Cedit, & id serpens prouidus ille notat.
Huic & simplicitas, æuo rarissima nostro
Perplacet, & uerus simplicitatis amor.
Simplicis ista docet mitis natura columbæ,
Quæ gerit, ex merito regia signa gerit.

AD CLARISSIMVM

DOMINVM ANSELMVM EPHO-
RINVM MEDICINAE
DOCTOREM.

HOc Desyderius tribuit tibi laudis Erasmus,
Quod sis Pierii, gloria summa, chori.
Illud adhuc etiam multi testantur, & inter
Lucida te claris laudibus astra locant.

Ergo

Ergo tuum merito, Doctor celeberrime, nomen
Deberet scriptis clarius esse meis.
Quod tamen inuitus, nolensi⁹ uolensi⁹ relinquo,
Dum mea mens Musæ gratius optat, opus.
Tu tamen intereā primis Ephorine Camœnus,
Dexterac⁹ auspiciis signa precare meis.

AD DOMINVM AL-

B E R T U M K V N I T Z K I,
V I C E S V P P A R I V M
B O C H N A E.

*

NOx erat, & placidū carpebant lumina somnū,
Cum uisa est oculis, cœlica Diua, meis.
Quæ mihi (more suo cum prospera quæc⁹ precat)
Ista dedit gracili, uerba diserta, sono.
Cras ubi Tithoni rubefœcerit æthera coniux,
Et trahet in medio Cynthius axe diem.
Cum domino Alberto lautissima prandia summes,
Qui decus, aternæ nobilitatis, habet.
Qui tibi se facilem semper præbebit, & æquum,
Et poterit Musis utilis esse tuis.
Lætus eram mentemq⁹ meam noua dicta mouebat,
Respondi placidæ, sic tamen ipse, Deæ.
Quidquid erit, non ulla moror, sed nostra futura est
Pieris ad partes officiosa suas.

F ij Ad dos

A D D O M I N V M C O N

R A D V M N E S E N V M I . V . L I .
C E N T I A T V M , E T C O N S V
L E M Z I T T A V I .
E N S E M .
*

Nobile Zittauii columen Nesene potentis,
Qui regis arbitrio, quidquid in urbe regis.
Forsitan accusas tardæ mea pectora Musæ,
Hanc animiçz putas desidis esse moram.
Quod tua non insunt nostro ueneranda libello
Nomina, perpetuo carmine digna cani.
Non elegi poterant tanti comprehendere laudes,
Ipsicçz uirtutis præmia uera, Viri.
Nos te digna breui, multo maiora, canemus
Deçz meum uero Consule carmen erit.

A D G E N E R O S V M

D O M I N V M I O A N N E M C Z A R N Y .
A W I T O W I C Z , I N P Q .
M I A N O W A .

M axime Sarmatios inter proceresçz Ducesçz
lane, nec Aonii gloria parua chori.
Detestanda bibit securæ pocula lethes,
Illius aut silicis semina pectus habet.

Qui

Qui te dicebat primo cognomine Czarny,
Quod nostro recte dicitur ore, nigrum.
Qui niger esse potes? quis & hoc te nomine dicat?
Perspiciens mentis candida quæçz, tuæ.
Candor & hic animi, (cuius bene notus honesto)
Purus & est constans & sine labe, tui.
Ergo si quis te nigrum, uel dixerit album,
Omnibus usqz tamen candidus ipse manes.

I N A R M A D O M I N I

C H R I S T O P H O R I C Z E T .
V I C Z A S C H I L T .
B A C H .

S I qz in hoc populo, cognoscat ut arma, studebit,
Qualia, Cetuitiæ gloria gentis, habet.
Non opus ut longis ambagibus ista requirat,
Sed legat hæc nostræ, scripta pusilla, Deæ.
Qualem dat nobis sydus cœlestè figuram,
Aut habet in Græcis littera quarta, notam,
Hunc imitata modum siebat fibula priscis,
Munus & emeriti militis illa fuit.
Hanc gerit in titulis, gemina cum cuspidे claris,
(Magnus & in pugnis cupidis usus erat)
Ista sibi tribuit præstans insignia Virtus,
Hæc gerit, antiquos gaudet & inter auos.

F ij Ad cla

AD DOCTVM ET CLA-

R I S S I M V M D O M I N V M V A
L E N T I N V M E C C H I V M,
P O E T A M L A V A
R E A T V M.

*

I Nter Apollineos Ecchi celeberrime Vates,
O Ecchi, Clario non abigende Deo.
Cum tua diuersis sint nomina nota sub oris,
Insuper ingenii, dextera uena , tui.
Cumq; triumphalis cingat tua tempora Laurus,
Quæ tibi perpetuum fertq; fereq; decus.
Cumq; ego qui doctas animum coluere per artes,
Sedulus assidua sedulitate , colam.
Expetit ergo tuum meritò, mea Musa , fauorem,
Optat & illa tuæ notior esse Dex.
Ergo age, nos animo nunc amplecteris amico,
Addita sit Musis & mea Musa tuis.

AD Q VENDAM MVL

T O S L I B R O S H A-
B E N T E M .

N Il ego multorum numerosa uolumina euro,
Sit licet exiguus, sed bene cultus , ager.

Pulcz

P R V L E X

I S A B E L L Æ F I L I Æ
R E G I Æ

*

R Egia solue precor strictas Isabella catenas,
Nec mea tam duro carcere membra premas;
Solue precor , tantis nec me cruciatibus urgas,
Sit procul à uultu cura , timorq; tuo.
Non fugiam , uigilans sed tēpus in omne studebo,
Officiis animum demeruisse tuum.

A D Q V E N D A M Q VI

S I B I V I V O R O G A V I T
E P I T A P H I V M .

*

Q Vod tibi uiuus adhuc carmē funebre precaris,
Signet ut id tumulum, post tua fata, tuum.
Ipse lubens, quantum potero præstare, parabo.
Ingenii uires experiere mei.
Sed prius ut dicas nobis erit usq; necesse,
Eripiet quo te, Parca seuera, modo.
Incerti sumus ante diem, qua sorte subibit
Quilibet, elisi grata uireta soli.

De castis

DE CASTITATE

MULIERVM NO-

STRARVM.

*

Bis duo lustra, fuit speculum immortale pudoris.
Penelopè, uiduo sola relicta thoro.
Tot tentata dolis, tamen hæc permanisit Vlyssi
Inter tot blandos, inuiolata, procos.
Hoc etiam nostræ faciunt, absente marito,
Legitimus nobis quas modo iunxit hymen.
Et ne quid timidæ tententur Dæmonis astu,
Nescio quæ tristes abdita claustra petant.

IVD MAGESTODO
A D D O M I N V M
N I C O L A V M H V B N E R V M
M E C O E N A T E M ,
D E S P R E T I S S T V D I I S .

Tvirba nouenarum ueniat licet ipsa Sororum,
Adsit & aonia doctus Apollo chely.
Si non attulerint, quod quod modo quæritur, aurū,
Omnibus ista cohors finibus exul erit.
Laudantur multum longæua Poemata Vatum,
Diuitis at Cræsi quilibet æra petit.
Sola regit uastum regina pecunia mundum,
Est quamvis stabilem, non habitura locum,
Spretus

Spretus Apollo iacet, spernuntur Palladis artes,
Suntqz nouem nullo nunc in honore Deæ.
Hoc si Vergilius, si clarus sciret Homerus,
Non foret ad patrios cura redire lares.
Quid facerent: hos dura famæ & turpis egestas,
Cogeret horrendæ fata subire necis.

A D O R N A T I S S I M V M
I V V E N E M C A S P A R V M F V R -
S T E N B E R G E R V M .

CArmina pauca tui mortem dictura parentis,
Accipe, promissam nunc tibi soluo fidem.
Si libet & potis es me nunc in pluribus uti.
Vtere, sollicita mente paratus ero.

E P I T A P H I V M C L A R I S S I M I
V I R I J A C O B I F V R S T E N B U R G E R I
P A T R I C I I G E D A -
N E N S I S .

Plangite nobiscum ciues, pueriqz senesqz
Plangite, tristitiae sint noua signa nouæ.
Qui potuit casus, urbisqz leuare procellas,
Hunc rapuit tristi, mors violenta, manu.
Hic quoties ibat uarias orator ad oras,
Nestorea potuit flectere uoce Duces.

ANUP DA

G Publica

Publica curabat studio, uigiliçp labore,
Certus erat uestri Duxçp paterçp status.
Vos memores, fatum cum sit mutabile nulli,
Nobiscum grata dicite mente preces.
Sit tibi pro meritis leuis & sine pondere tellus,
Et tua perpetuo molliter olsa cubent.

DISTICHON ANNI NV.
MERVM CONTINENS
EIVSDEM.

*

Q Vo coniux tristi, post funera mœsta, locatur.
Huc ego post uitæ, fata seuera, locor.

A D Q V E N D A M G L O;
R I O S V M E T R U S T I C V M
P O E T A M.

*

N Vper ut urbanæ legi tua carmina Musæ,
Quæ certè falsi plena saporis erant.
Laxior alius erat subito, dentesçp dolebant,
Amisit uires pesçp caputçp suas.
Talibus & noster uerbis iurabat Apollo,
Vnus hic ex multis, pinea serta, feret.

Ad quen-

A D Q V E N D A M
Q V E M C O M I T E M
H A B V I T.

P Ro meritis in me collatis, munus habebis,
Qui nobis comites maximus inter eras.
Non precor Hesperidū præstantia mala Sororum,
Nec tibi pactoli ripa beata fluat.
Sed quod multa uelim festertia diues, haberet,
Attamen hæc uario te rapuisse dolo,
Et te carceribus clausum, uinctumçp teneri,
Vtçp breui coruis turpibus esca fores.

A D D O M I N V M
N I C O L A V M H V B N E R V M
M E C O E N A T E M.

M E, uitamçp meam tibi debo, sumçp paratus,
Pro te si iubeas, terçp quaterçp mori.
Omnia Schröterus tibi se debere fatetur,
Donec in hoc uiuo corpore, uiuus aget.

A D Q V E N D A M . V T
S A E P I V S S C R I B A T.
H O R T A T V R.

F Orsitane studium, Musasçp perosus Adami
(Quod procul auertat Diua Minerua) cui.
G ij Quod

Quod mihi tam raro, blandam dictura salutem,
 Perfertur digitis, charta notata, tuis.
Quando diem toties uotis, precibusq; petitam,
 Tithoni roseis proferet uxor equis?
Qua tandem uideam, uestræ pia scripta Thaliæ,
 Quæ mihi te reddant, admoneantq; tui.
Hanc ego nempe diem, seris annalibus addam,
 Materiamq; meis uersibus illa dabit.

I N I M A G I N E M
ISABELLÆ FILIAE
REGIAE.

R Egia sic oculos Isabella, genasq; ferebat,
 Talis & in mœsto corpore, uestis erat.
Tristis ut amisit regni diadema potentis,
 Et dedit insolito, colla premenda, iugo.

A D I N V I D V M .

Quod Mecœnatem Schröterus habebat amicum,
 In promptu causa est, officiosus erat.

A D C A N D I D V M L E C T O R E M .

Pignora prima Deæ, uultu lege lector amico,
 Nam tibi, non criticis pignora nostra patent.
Este procul critici, procul hinc estote Catones,
 Quilibet in propriis ingeniosus erit.

Ad claris

A D C L A R I S S I M V M
ET NOBILEM DOMINVM NI-
COLAVM HVBNERVVM,
MECOENATEM,
CVM PRIMO ABIRET IN VNGARIAM.

Dulcis studii Patrone nostri,
Præbet materiam meis Camœnis
Scribendi, pietas, fauorq; summus,
Quo me non meritum foues, alisq;
Cogit me mea grata mens, iubetq;
Vt soluam tibi gratias perennes,
Vt te carminibus meæ Thaliæ,
Inter sydera collocem, feramq;
Quamuis pertenuis, nimisq; uilis,
Quamuis est tenebris sepulta magnis,
Æquè sed rogo consulas, boniç.
Olim cum fuerit magis sub antro,
Musis Pierio, polita sacris
Omnes te populi tuumq; nomen,
Inter nubila summa sic leuabunt,
Vt te posteritas legat, sciatq;
Quatuor rerum elementa dum manebunt,
Summi conspicuo poli sub axe.
Multum debo si meo Parenti,
A quo prima meis origo membris,

G. in A quo

A quo prima meis origo Musis,
Qui me Thespia dum per antra duxit.
Quid debere tibi Patronē dicam?
Qui à me munifica atq; liberali
Dextra, pauperiem fugas & aufers.
Inter Laurigeros locum Poetas,
Tu nobis tribuis, colende Vates.
Quare te mea Musa liberalem,
Vt semper meritò uocet Patronum,
Nunc quantum potis es, solesq; præsta.
Me quo pectore nunc amas, amato.
Me quo pectore nunc foues, foueto.
Sic det perpetuam tibi quietem,
Qui terras, Dominus, polosq; fœcit,



Virtus sola rogos fugit supremos,

cup A p. D

LECTORI ANDREAS TRICESIVS.

*
PErlege Schroteri, carmen iuuatile, Poëtae
Fœturamq; nouam candide quisquis ades,
Ista tibi dantur, qui postq; legeris, adsint
Auspiciis, dices, numina dextra bonis.
Non tibi qui toruam caperabis liuide frontem,
Liuide uipereo felle peruncte iecur.
Nam tibi nulla placent sint perfectissima quamuis,
Ipsi & summi pectore nata Iouis.
Censorem tales non uult hic ferre libellus,
Iudicii at pectus candidoris amat.
Crescat ut Autoris lectorum Musa fauore,
Plura breui his longè qui meliora dabit.
Sic etiam paruis oriuntur flumina riuis,
Postmodo quæ uasto gurgite adaucta ruunt.
Sic nuper quæ uirga fuit succrescit in altum,
Et latas platanus tollit in astra comas.

A R A O H T Y X H.

A faint watermark or stamp in blue ink, oriented vertically, featuring a crown at the top, a shield in the center, and the text "SIEGMAR UND" above and "FRIEDRICH" below it.

THE HOKTA



Biblioteka Jagiellońska



std10000198



